



موسمها في نوفمبر وأول عبورها يكون حجمها صغيرا

المشموم: الجنعة «العودة» بكبر وقاروه.. وصيدها «بالقفشه»

صفحة «بحري» تلتقي اليوم الحداق عبدالله المشموم الذي تولع بحب البحر صغيرا، فكانت بداياته على الاسياف وتفننه بصيد اسماك الجنعة وأوقات عبور النقرور والشيم واماكن تواجدهم وأهم الاسماك الحاضرة الآن في الشمال والجنوب واسرار صيد السبيطي، وفضل ييم له ومتى تبين الجنعة العودة واماكن صيدها، كما اطلعنا المشموم على موسم الهامور وطريقة صيده والطريقة الجديدة للفوز بالجنعة التي توفر الوقت والجهد ومعلومات عن صيد الحداق الشمالية والمحاذق الجنوبية وأنواع الاسماك التي يبحث عنها الحداق الكويتي في اغلب رحلات صيده، فإلى التفاصيل:

قبل ما ياكل يلعب بالييم ويكون حريصا وبعدها يضرب.
ضربة الجنعة طرب

ويقول: الجنعة موسمها في شهر نوفمبر وأول عبورها يكون حجمها صغير مو كبيرة وتبين دائما في الجنوب من جليعة الى أم المرادم وطريقة أفضل طريقة لصيدها هي التشخيص بالقفشه والبورد وعلى شهر يناير وفبراير تبين الجنعة العودة بكبر وقاروه وأم المرادم وتقدر تصيدها بالحقق لأنها تكون بالعمق اغلب الأوقات، وسر حبي لها هو طريقة صيدها لأن بييلها فن وتكون عارف شنو تبني الجنعة ولما تصيدها تحس بشعور عجيب واحلي صيد لها يكون بالسنارة للحجم الكبير منها وعندما تضرب عليك تسمع صوت المكينة طرب.

طريقة صيد الشعم والهامور

ويضيف: ما في احد ما يحب الشعم وصيدها واكلها وتتواجد بالرفوق وداخل الجون أكثر شي، وطريقة صيدها بالصيف خيطك ركه طويلة وييمتك شريب، وفي الشتاء ييمتها ريبان ومصبران دجاج وركه طويلة ويكون الخيط من 25 لغاية 40، مميزات الشعم انها سمجة نكية ولها طريقة سحبة للخيط تعرف انها شعم وفي ناس يحدقون بالسنارة وطريقة سهلة وصيادته عن تجرية لان السنارة تلتسط على طول، الهامور اماكن صيده أكثر شي بالطبعانات والاقواع موسمها شهر ابريل وسبتمبر وتكون المايه فساده وتحقق له على مائة ثبر ويكون خيطك من 80 و فوق الليمه المفضلة للهامور الحجم ويكون محايبة والخناق واي سمجة حيه ثانية تكون حجمها من كف اليد وأكبر بشوي ولان تكون صبوراً على الهامور لانه عادي تصيده بيوم ويوم ثاني ما تصيده.

خامية

واختتم المشموم قائلا: أكثر شي يضايقني بالبحر اذا كنت طالع ويصير شي بالطراد فجأة طبعاً طلعتك خربت او نسيت شياً مهماً بالبيت والطلعة ما تسوه من غيره، واذا كنت طالع مع واحد غشيم بالبحر ما تدري تدير بالك عليه او على البحر والمشكلة بسبب لك مشاكل بالطلعة حتى لو تعلمه ما ينفع معاه فتضطر أنك ما تكمل طلعتك معاه، وطبعاً التلوث والقراير والصيد الجائر وتسكير الجون على الحداقة.

تولعت بحب البحر والصيد منذ صغري مع الوالد وكان يطلعني معاه على الاسياف وحبيت هذه الهواية لىن طلعت لىسن، بعدها قمت اروح اسياف الكويت من الشمال الى الجنوب وكان الصيد طيباً ولما تخرجت اهدتني والدتي طراداً في سنة 2008، وكان الوالد يعلمني على الطراد من ناحية التنزيل وتصعيد الطراد وكنت أروح لمحاذق الفطناس والحيشان والدوحة وكبر وقاروه وأم المرادم وبعدها قمت اطلع بروحي وتعلمت كل شي في البحر.

أوقات عبور النقرور والشيم

ويضيف: النقرور والشيم بيين بشهر ابريل وسبتمبر، اول عبور للنقرور من الجنوب وعند الطبعانات وفوق كبر وينزل الى الفطناس وبعدها يروح شمالاً بالأطيان ويدش الجون وبعدها يصعد الى جزيرة عوهه اماكن الصيد الطبعانات وصوب الصبية وبر كاظمة وطبعانة عوهه، الشيمة وقت عبورها من الشمال ولان تكون المايه حمل اماكن حداقها رأس الأرض الدرود ومدخل الحيشان هناك معبر وفيه درود تبين فيه الشيمة.

اسماك حاضرة الآن

ويتابع: السمجة الحاضرة الآن في الاقواع الجنوبية الشعري والبوليل والعندق والقرقفان، وفي الجزر تحصل شعاري وبواليل وفسكر وقرقفان وجنعد وعندك الطبعانات بيين فيها هوامير وبواليل وشماهي، وفي المحاذق الشمالية ميين نويبي وشعم وبواليل ونقرور وينم ووحر وسبيطي وفي محذاق الجزر فيلكا وعوهه تحصل شماهي ونقارير وشعم وسبيطي وبواليل.

ركة طويلة أو طفاحي للسبيطي

ويضيف: السبيطي تحصله بالرفوق أكثر شي وسمجة نكية وله مايه يضرب فيها، وعلى حسب الوقت اللي بتصيد فيه السبيطي لازم تعرف شنو الليمه اللي تكون موسمها مثلاً موسم الميد تكون الليمه زوريه محايبة وخيطك ركه طويلة او طفاحي وعندك النقاچه تقص راسها وتحقق فيها ومصبران الدجاج هذه افضل ييمه حق السبيطي، ولما تحقق لا تحرك الخيط لأن السبيطي

